

Somo la Machi 23, 2025

Harufu Tamu kwa Mungu

*Mstari Mkuu: “Ataosha matumbo yake na miguu yake kwa maji; kisha kuhani atayateketeza yote juu ya madhabahu, iwe dhabihu ya kuteketezwa, dhabihu ya kusongezwa kwa moto, ya harufu ya kupendeza kwa BWANA.
— Mambo ya Walawi 1:9*

*Maandiko Matakatifu:
Mambo ya Walawi 1:1-17*

MFANO UNAO onyeshwa na hisi ya kunusa hutumiwa katika Maandiko ili kutoa wazo la dhabihu na ujitoaji. Katika Waefeso 5:2, mtume anasema, “Enendeni katika upendo, kama Kristo naye alivyotupenda sisi, akajitoa kwa ajili yetu, sadaka na dhabihu kwa Mungu, kuwa harufu ya kupendeza. Kwa lugha hii, Paulo anarejesha akili zetu kwenye ibada za Hema la Kukutania la Israeli ambapo, kuhusiana na sherehe zake, uvumba uliteketezwa juu ya Madhabahu ya Dhahabu katika chumba cha Patakatifu, ambayo harufu yake ilipenya nje ya pazia la pili hadi Patakatifu Zaidi. Maagizo ya tendo hilo yalisema kwamba kungekuwa na “uvumba wa milele mbele za BWANA katika vizazi vyenu.”— Kut. 30:1-8.

Maagizo yaliyokuwa yakisimamia huduma za Hema la Kukutania yalikuwa sahihi sana. Katika Siku ya Upatanisho ya Israeli, Haruni, kuhani mkuu, alichukua damu ya dhabihu za dhambi ndani ya Patakatifu Zaidi ili kuinyunyiza juu ya kiti cha rehema. Hata hivyo, kabla ya kufanya hivyo, ilihitajika kwamba uvumba uhomwe kwanza kwenye Madhabahu ya Dhahabu ili moshi na harufu yake iingie Patakatifu Zaidi kabla ya Haruni kupita chini ya pazia. Ikiwa hilo halingefanywa, angekufa anapoingia Patakatifu Zaidi. (Law. 16:11-14) Moshi na harufu ya uvumba ulioteketezwa ilikuwa uthibitisho wa

kwamba kazi ya dhabihu ilikuwa imefanywa ifaavyo na ilikubalika kwa Mungu.

Dhabihu za wanyama ambazo ziliteketezwa kwenye Madhabahu ya Shaba pia zilizingatiwa kuwa “harufu tamu kwa Bwana,” kama inavyoonyeshwa katika Mstari wetu Mkuu na muktadha wake. (Law. 1:5-9) Matoleo ya nyama, au nafaka, yalipoteketezwa juu ya madhabahu kulingana na maagizo ya Yehova, vivyo hivyo yalionwa kuwa “harufu tamu.”— Law. 2:1-9.

Sherehe zilizotangulia za Waisraeli ambazo zilionwa kuwa “harufu tamu” zote zilionyesha kwa njia mbalimbali huduma, utii, na dhabihu ya Yesu, ambayo ilipaa kwa Mungu kuwa “harufu nzuri.” (Efe. 5:2) Wafuasi waliowekwa wakfu wa Bwana wao pia wanaalikwa kutoa dhabihu na kubatizwa katika kifo cha Yesu. (Rom. 12:1; 6:3, 4) Kazi ya Mkristo ya dhabihu inaelekezwa hasa kwa niaba ya washiriki wenzake wa “mwili wa Kristo.”—1 Kor. 12:12-14,27.

Katika Wafilipi 4:18 , Mtume Paulo, akirejelea ushahidi wa dhabihu kwa upande wa kanisa la Filipi katika kumpelekea zawadi akiwa gerezani huko Rumi, anairejelea kuwa “harufu ya manukato, dhabihu yenye kukubalika, impendezayo Mungu.” Hapa tuna mamlaka ya Paulo mwenyewe kwa kutumia masomo ya Hema la Israeli kwa kanisa. Inaonyesha, zaidi ya hayo, kwamba Mungu anajaribu unyoofu wa wakfu wetu kwake kwa moyo wote wa dhabihu na huduma yetu sisi kwa sisi.

Ufananisho wa hisi ya kunusa unapaswa kutuwezesha kupambanua kati ya ujitoaji wa kweli kwa Mungu na utumishi wa mdomo tu. Mahali ambapo hatuwezi kutambua “harufu” yoyote ya dhabihu, tunaweza kushangaa jinsi Kweli imeshikilia kwa undani maisha yetu ya kiroho. Maono yetu ya Ukweli yapasa kufichua pendeleo la dhabihu na utumishi kwa niaba ya wengine, na ujitoaji wa moyo wetu kwa Bwana unapaswa kutufanya wepesi kuyatoa maisha yetu ili wengine wapate kubarikiwa. Hivyo, harufu nzuri ya ujitoaji wetu itakuwa kali.— Yohana 15:13; 1 Yohana 4:7-11.